

Formula maneho for di 2010 ta dicidi awe pa Aruba

Na 2010 mester a crea tercer pilar economia

*Turismo y refinaria tabata mara na riesgo grandi

*Maneho di pasado awe ta tranca comercio local

ORANJESTAD(AAN)--E inseguridad grandi presente den tur sector di e pais, ta motibo pa DIARIO sigui profundisa den e motibonan di e actual crisis di Aruba. Na mes momento mester investiga posibel alternativanan pa e pais. Investigacion di DIARIO ta muestra cu e maneho financiero y economico introduci despues di eleccion 2009, mester a duna e resultado cu a conduci na e situacion actual di crisis di Aruba. No a crea un tercer pilar economico pa e pais cu a keda dependiente di dos pilar peligroso debi na nan riesgonan. E maneho financiero tabata desastroso.

E Gobierno actual di Aruba no solamente lo mester mira con e ta bay atende cu e situacion financiero. E mester traha un plan economico nobo cu ta evita cu Aruba ta bandona e zona di riesgo grandi cu turismo y refinaria ta contene.

Tin cierto desaroyonan cu Gobierno actual lo no por hala atras. Esaki sigur ta e caso cu e forma cu comercio local na e momentonan aki ta ser afecta y ta menasa cupo di trabou.

Den e investigacion cu DIARIO a conduci, ta suma-

mente importante e declaracion di gobierno anterior cu Hulanda ta mira cifra pero e ta mira "hende". E formula pa maneha un gobierno di hende sin tene cuenta cu cifra, ta duna un contesta na loke a pasa cu Aruba.

GOBIERNO ANTERIOR A OPTA PA RUTA FACIL

No por papia di calidad ora inventarisa e maneho cu a ser hiba na Aruba di 2009 te na e momento cu un Gobierno nobo a tuma mando na 2017.

Na momento cu Gobierno a sinta y entradanan di e pais y desaroyonan cu por a spera tabata indica cu mester hiba un maneho financiero prudente, a dicidi pa baha BBO na mita, manera a priminti den eleccion.

Pa tal decision no tabata tin mester di calidad ni conocimiento gubernamental pasobra baha belasting mester a conduci na alegria cerca pueblo, cu no tabata realisa kico esaki lo a nifica pa Aruba.

Rapportnan di instancianan oficial ta muestra con sin ningun nocion di peligro, a cuminsa aumenta e debe

nacional y haci gastonan mientras a baha entrada di e pais.

E aparato gubernamental a sigui crece mescos cu e debe nacional. Pueblo no por a mira e peligro grandi ora el a bay vota na 2013. Na 2014 e cuenta a ser presenta na pueblo di Aruba dor di Hulanda, cu a confirma informacionnan manera di Banco Central cu Aruba tabata tin un debe nacional cu a surpasa 3.8 Bion.

E debe aki tabata representa 75 por ciento di loke poblacion di Aruba tabata produci den un aña. 71 por ciento di entrada di Gobierno tabata bay pa paga personanan den servicio di Gobierno. Hulanda a exige pa gobierno anterior tuma medida, cu mester a evita cu Aruba lo a conoce un caida financiero y economico fatal.

Gobierno anterior a tuma e camindanan mas facil pa e pais, manera tur informacion den rapportnan oficial ta presenta.

REFINERIA Y TURISMO CU BASE PELIGROSO

Na 2010 Valero a cera e portanan di refinaria. E tercer intento di parti di refinarianan reconoci na mundo pa por tene e refinaria di Aruba den operacion, a fracasá.

Na 2014 Aruba tabata depende di turismo, cu tabata registra aumento. Tabata obvio cu Aruba mester tabata cuidadoso cu turismo pasobra el a crece a base di e cantidad di Venezolanonan cu tabata saca placa for di nan pais cu a conoce un caida di su sistema economico y financiero.

E supuesto turistanan di Venezuela tabata biaha pa destinacionnan den Caribe pa lanta nan placa for di nan cuentanan bancario.



E desaroyo aki tabata musta riba e base peligroso di turismo, cu ta depende di factornan cu Aruba no tin den su man y cu ta haci cu hamas turismo por ta e unico entrada di e pais.

Den un situacion economico y financiero serio, na 2014 gobierno anterior a bay busca un solucion pa economia y a atrae e compania CITGO cu ta un subsidiario di Gobierno Venezolano.

Sin e consulta cu mester tabata tin cu Parlamento a yega na e acuerdo cu CITGO cu tabatin mas riesgo y peligro cu posibilidad di exito.

E resultado na 2018 na Aruba ta conoci. No a sigui amplia economia di Aruba cu for di 2016 a biba cu speranza cu no ta cuadra cu realidad.

NO A CREA TERCER PILAR ECONOMICO PA ARUBA

E vision di gobierno anterior no a encera e creacion di un pilar economico nobo pa Aruba. Si gobierno anterior a laga expertonan mundial cu conocimiento di e materia ta su guia, lo e por a atrae otro formanan di industria cu no ta turismo ni refinaria, pero cu lo a sostene e base

social, economico, comercial y financiero di e pais.

Tin varios modelo di industrianan moderno cu por aplica na Aruba, teniendo cuenta cu e tamaño y cantidad di habitante di e pais.

Den mundo di tecnologia moderno ta sumamente facil pa bin cu industrianan cu ta crea cupo di trabou, ta percura pa recuperacion economico y financiero y asina ta crea e efecto di circulacion di placa cu Aruba mester.

Aruba mester a busca asistencia di expertonan na 2014 pa expande su base economico y comercial cu companianan local y internacional cu por a percura pa diversificacion real sin uza fondo publico.

Por conclui cu e gobernacion cu a ser hiba di 2009 te 2017 ta resalta pa falta di introduccion di proyectonan realistico cu por a conduci na crecimiento economico balansa na Aruba.

A opta pa un maneho facil, sumamente peligroso pa Aruba, cu awe ta den problemanan serio.

E gobierno nobo di Aruba, cu a asumi poder na 2017, lo mester bay uza metodonan internacional moderno y inventivo pa expande e base economico y comercial di Aruba riba termino corto.

"PAKIKO"

Mi no a pidi pa nace pakiko maltrata mi mi no a pidi molestia mucha tey pa alegria mi no gusta fastidia atenshon e kier lage pe sinti su infancia i disfruta plenamente sin e dolor i rechazo pa actitud no anhela corda tur tin derecho di gosa como mucha no abusa sin piedad lagando frustrashon e inocencia destrosa

bibando jen di miedo yorando den silencio

Pakiko haci dolor pakiko no respeta e mucha inocente lagrima na wowo ta grita basta awo pa tanto maltrato .

Nan tin tur derecho pa ta felis cu Amor.

Autor : Omaira I. Rodriguez-Britten